

Jedem sei eischner Vaein

Die Oma is 50 Jahr im Middavaein, do werdse geehrt,
de Oba 50 Jahr im Gaadebauvaein, das is e Ehrenodel wert.
Die Mamme macht beim Kneibvaein Gymnastik,
weje da Figur; sie is halt e bissje zu dick.

Es Määde – unn do isses aarisch stolz aach druff –
Drähd onn Faasenacht mit de Gaade uff...
De Jingschd schunn e Zeit bei de Fußballer is;
er wird emol Profi, das glaabder gewiss.

De Middelschd issem Vaein beigedräh, do machder Muschgeldraining; er wird mol Athlet..
Nur de Babbe unn de äldschde Bub,
die sinn in kemm Vaein, die sinn im Club.

Im Keeschelclub, der is nit vunn Pabbe,
der ersetzt e paar Vaeine, saht de Babbe.
Was die außerm Keeschele alles betreiwe,
konn ma mit Worde kaum beschreiwe.

Nohm Keeschelschiewe, wenn die Kehl is drugge,
duun se gemiedlich omm Schdammdisch hugge.
Schlummse ihr Biersche, aach zwei odda drei.
Do kamma sisch entschponne debei.

Die Schdimmung is gudd; Unn isses noch frieh,
klobbt ma e Schkad, macht e Schachbaddieh.
Dann wird bolidisierd, ma kried sisch in die Woll.
Sie sinn ohngeheiderd, awwer noch nit gonz voll.

De Wird dischbedierd mit; heit hadda volles Haus.
Zu vorgeriggder Schdunn gebbder aach ääner aus.
Zum Donk donn sei Lieblingslied erschalld,
vumm Rehlein omm Bache, draußen im Wald.

Vor Neid erblasse kinnt do jeder Chor
bei denne Schdimme: Bass, Baridon unn Denor.
Inzwische isses schunn schbäd
unn mit Gesang es nun hemmwärts geht.

Omm onnere Dah hat de Babbe im Kobb Migge.
Er kunnt gaa nix schaffe, er kunnt sisch nit bigge.
Ach, was hat der arm Babbe e Pein.
Kommendar vunn da Mamme:
Ihr sinn mir emol e scheener Vaein!

Helene Keller